

如以毛繩戮	皮斷肉骨壞
髓斷爾乃止	利養過毛繩
絕於持戒皮	能破禪定肉
折於智慧骨	滅妙善心髓
譬如嬰孩者	捉火欲食之
如魚吞鉤餌	如鳥網所覆
諸獸墜穽陷	皆由貪味故
比丘貪利養	與彼亦無異
其味極少	為患甚深重
詐為諂佞者	止住利養中
親近慣鬧亂	妨患之種子
如似疥搔瘡	搔之痒轉增
矜高放逸欲	皆因利養生
此人為我等	遮於利養怨
我以是義故	應盡心供養
如是善知識	云何名為怨

由貪利養故	不樂閑靜處
心常緣利養	晝夜不休息
彼處有衣食	某是我親厚
必來請命我	心意多攀緣
敗壞寂靜心	不樂空閑處
常樂在人間	田利毀敗故
不樂寂定法	以捨寂定故
不名為比丘	亦不名白衣

(四二)復次俱得漏盡教學差別。我昔曾聞。尊者目連教二弟子。精專學禪而無所證。時尊者舍利弗問目連言。彼二弟子得勝法不。目連答言。未得。舍利弗又問言。汝教何法。目連答言。一教不淨。二教數息。然其心意。滯而不悟。時舍利弗問目連言。彼二弟子從何種姓而來出家。答言。一是浣衣。二是鍛金師。時舍利弗語目連言。金師子者應授安般。浣衣人者

宜教不淨。目連如法以教弟子。弟子尋即精勤  
修習得羅漢果。既成羅漢歡喜踊躍。即便說偈  
讚舍利弗

第二轉法輪	佛法之大將
於諸聲聞中	得於最上智
有勝覺慧力	嗚呼舍利弗
指導示解脫	隨順本所習
指導開悟我	二俱速解脫
行自境界中	獲得所應得
行他境界者	如魚墮陸地
我常在河側	習浣衣白淨
安心於白骨	相類易開解
不大加功力	速疾入我意
金師常吹囊	出入氣是風
易樂入安般	眾生所翫習
各自有勝力	今者舍利弗

佛法之鞅韉	佛說舍利弗
第二轉法輪	真實是所應
心得自在者	能使我二人
善知禪徑路	我如不調象
法中之大將	言教調順我
使到安隱處	故我大歡喜

(四三)復次善根熟者雖復逃避如來大悲終不放  
捨。我昔曾聞。如來無上良厚福田。行來進止  
常為福利。非如世間所有田也。欲示行福田異  
於世間田。行福田者往至檀越下種人所入舍衛  
城分衛。乃至為菩薩時入王舍城乞食。城中老  
少男女大小。見其容儀心皆愛敬。餘如佛本行  
中說。昔佛在時眾生厭惡。善根種子極易生  
芽。佛所應化為度人故入城乞食。即說偈言

若以深信心	禮敬佛足者
是人於生死	便為不久住